

31 JUL 1999

Musa-Pelajar

KELEMAHAN PELAJAR MELAYU PERLU DIATASI

BANGI, Julai 31 (Bernama) -- Umno dan Kerajaan perlu mengambil inisiatif segera bagi mengatasi jurang pencapaian akademik antara pelajar Bumiputera dan bukan Bumiputera, kata bekas Timbalan Perdana Menteri Tan Sri Musa Hitam hari ini.

Jurang pencapaian akademik yang terlalu luas haruslah dielak sama sekali....kalau tidak ianya pasti akan mengancam keharmonian negara dan semua kejayaan yang dibanggakan selama ini akan terhapus, katanya.

Musa berkata Umno perlu menganjurkan perjumpaan khusus, sama ada seminar atau kongres, yang juga melibatkan ahli akademik, para profesional dan pelajar supaya masalah ini dapat ditangani.

"...Kongres ini bukan untuk mencari salah atau menang sorak tetapi untuk mencari kesimpulan dan diserahkan kepada kerajaan untuk dilaksanakan," katanya di hadapan kira-kira 200 mahasiswa pada majlis "Kongres Gabungan Anak Johor 99" di sini hari ini.

Musa berkata kerajaan pula perlu menubuhkan sebuah pasukan kerja untuk mengumpul maklumat, meneliti dan seterusnya mengemukakan cadangan untuk mengatasi masalah tersebut.

Musa mengulas kenyataan Perdana Menteri Datuk Seri Dr Mahathir Mohamad, pada 20 Julai lalu, yang melahirkan rasa sedihnya mengenangkan jurang perbezaan pencapaian akademik antara pelajar Bumiputera dan bukan Bumiputera.

Sementara itu, Menteri Luar Datuk Syed Hamid Albar Syed Jaafar yang turut hadir pada majlis berkata, kerajaan melalui Kementerian Pendidikan sedang mengkaji masalah itu serta mencari langkah-langkah untuk mengatasi.

"Mekanisme untuk mengatasi masalah ini sememangnya sudah ada melalui Kementerian Pendidikan... saya fikir tidak perlu diadakan satu pasukan khas mengenainya," katanya.

Pemangku Ketua Pergerakan Pemuda Umno Datuk Hishammuddin Hussein yang juga hadir pada majlis itu berkata pergerakan itu kini sedang berusaha "merapati" para pelajar bagi mengenal masalah para pelajar dengan lebih mendalam.

"Kita sudahpun mempunyai saluran tertentu termasuk biro pendidikan untuk mengumpul maklumat mengenai permasalahan pelajar Melayu ...dan jika itu tidak mencukupi, kita sedia menambah saluran bagi membolehkan pelajar meluahkan pendapat mereka," kata Hishammuddin.

Masalah jurang perbezaan pencapaian akademik pelajar Bumiputera tidak dapat diselesaikan dengan sekelip mata dan apa juga cadangan yang dikemukakan perlulah mengambil kira semua aspek, katanya.

--BERNAMA

MOT RI